

3. maji. 2017

Uunga siunnersuut: Illoqarfinni annerusuni arfineq marluusuni ungasissumiit kiassarnikkut, innaallagissamillu kiassarnikkut ullumikkuminngarnit suli annerusumik atorluaanerulernissarput siunertaralugu, Naalakkersuisut suliniuteqaqqullugit peqquneqarnissaannik Inatsisartut aaliangiiffigisassaattut siunnersuut. Illoqarfiit pineqartut tassaapput Ilulissat, Qasigiannugit, Aasiaat, Sisimiut, Maniitsoq, Nuuk aamma Qaqortoq.

(Inatsisartunut ilaasortat Peter Olsen Inuit Ataqatigiit)

Ulloq 1. Januar 2018-imut qitiusumik kiassaateqarfinnut kissarsuuteqarfinnullu il.il.

Namminersorlutik Oqartussanit toqqaannanngitsumik toqqaannartumilluunniit pigineqartunut tamanut piginnittuunerup, akisussaanerup, ingerlatsinerup

serfallatsaaliinerullu il.il. Nukissiorfinni ataatsimut katersorneqarnissaat pillugu

Naalakkersuisut peqquneqarnissaannut Inatsisartut aalajangiiffigisassaattut siunnersuut.

(Inatsisartunut ilaasortanit Anders Olsenimit, Vivian Motzfeldtimit, Bendt B. Kristiansenimit Villy Olsvig-imit aamma Mala Høy Kúkomit)

Inuiaqatigiinni aqqissuussaaneq, teknikkikkiuppat imaluunniit aallatut aqqissuussaaneq pineqarpat, arlaatigut ilisimasat annertusiartornerani pitsaanermik aqqissuussinerit amerlasuutigut ersertarput. Ukulu siunnersuutit marluk pineqartut taamatut Siumumiit isigaagut.

Nalunaarusiat ilaatigut pineqartut, siunnersuutip 183-imik normulikkap tungavilersuutaani takuneqarsinnaasut, oqariartuutigaat qitiusumik kiassaateqarfiit kissarsuuteqarfiillu piginnaasaat ilaatigut tamakkiisuunngitsumik atorneqartut. Taakkulu kiassaateqarfiit imminnut ataqatigiilersinneqarnerisugut arlalinnik pitsaaqutinik kinguneqassasoq, tassalu ilaatigut inuiaqatigiit ataatsimut isigalugit aningaasatigut sipaarutissaqartoq, aammattaarli kiassarnermut uulia atorneqartoq annikillinissaa anguneqassamat, silaannarmut mingutsitsineq annikillisinneqarnissaa naatsorsuutigaarput.

Nunatsinni inuit ikittuinnaanguugatta pigisatsinnik periarfissatsinnillu atorluaanissaq Siumup ilalernartippaa. Assersuutigalugu nalunaarusiami imatut qulequtalimmi: “Kiassaateqarfinnik

ingerlatsilernissamut (tigusinissamut) nalunaarusiamut immikkoortoq ”, taakkartorneqarpoq assersuutitut Nuummi kiassaateqarfiit imminnut suleqatigiisilernerisigut, kiassaateqarfiit ilai qaminneqarsinnaasut. Taamaasilluni pisortanut atuisunullu aningaasatigut sipaarutissat annertusinnaaneri piffissaq ungasinnerusoq naatsorsuiffigalugu takuneqarsinnaavoq, ilaatigut uuliamik atuineq annikillisinneeratigut aammali aserfallatsaalisassat kiassaateqarfiit ikilisinneeratigut.

Taamaammat Naalakkersuisut nukissiuuteqarnermut suliassaqarfimmut pilersaarummik suliaat ingerlasoq ilisimaarigaluarlugu, siunnersuutit qulaani pineqartut sunniutissai inuiaqatigiinnut aammalu avatagiisitsinnut pitsaasutut isigalugit Siumumiit ilalernartippagut.

Siunnersuutit aappassaaneerneqartinnagit Sanaartornermut ataatsimiititaliamut nalilersoqqullugit innersuuppagut, ilaatigut maannakkut aalajangiiffiginerisa pitsaaqutaat ajoqutigisinnaasaallu ilanngullugit nalilersorneri.

Jens-Erik Kirkegaard

Siumut